

# Jon Yininkan Kumwimp Pas

Mekia Akwapnámp Kar

Jono náráp nouroup Gaiusompor mámá pas má kumwia sámp-kérépámpon. Mao te námokuráp e érik sér mono, párák ‘Sios taokeyak konámp arop’rá sénámpon. Gaius te ankwap Kristen fárákapan yaewour i konámpantá, man warákár konámpon. Tá mao Gaiusén ankwap kar sérrá, “Amo ankár Diotrefesomp kwatae ninik fwapia mérampo’rá sénámpon.

---

<sup>1</sup>Onomp nánae Gaius e! Ono sios taokeyak konampao má pas má kumwiaka amonapok kérép rae. Ono waeman kare kar amwan warákár kare nampon.

<sup>2</sup>Onomp nouroup kwapwe e! Ono wae mér nampon: Waráp waemp te waeman kwapwe kare yak námpara, amo nkwakwe make tére nap ponankor kwapwe kare nángo, amokuráp pourou kareaok kor yae-párák yakanoria nampon. <sup>3</sup>Wokwaek arop ankwap fárákapaokoroepa onan nkea, ‘Amo te Kwaromp kar kareaok saráp yarak i konapono’rá sénapo, ono am kar wawia warákára wae nampon. Kare karono, ono wae mér nampon: Amo te kare kar karaok saráp yarak i konapon. <sup>4</sup>Onomp tárápuaok Kwaromp kar wawiaka mántwaok paokop napan, ono am kar wanamp ke fek te warákár tokwae konampono. Mámá warákár tokwae te, ankwap ankankan warákár konampan kámákár akwap námpon.<sup>a</sup>

## Gaiuso kwapwe kare térenámp kar

<sup>5</sup>Onomp nouroup kwapwe e! Amo waráp ankwapyenápén yaewourrá tére nap te, yae-párák kare tére napon. Tá amo panekamp ankwapyae fárákapan kor takrá yaewour napon.<sup>b</sup> <sup>6</sup>Am mekamp arop ankwap fárákapaokoroepa mapekamp sios mekamp koumteouráp aropan waráp nouroup’rá yaewour i konap niníkan sénapono. Amo fwap Kwaromp niníkaok nap kwamp te, am arop paneknámp Kwaromp kar koropá farákápea tukup napo te mwaeaoak mank, am fárákapan fir yaewour

---

a 1:4 1 Ko 4:14-15    b 1:5 Ro 12:13

nap, am te kwapwe karenono.<sup>c</sup> <sup>7</sup>Am te apaeria, am arop Jisasomp kar farákáprá paokop nap fek te, Kwarén mér monap arop farákapamp yaekamp ankank sámp mo i konapono.<sup>d</sup> <sup>8</sup>Nomo Kwaromp kar farákáprá paokopnap arop fákáreran yaewour námp te kare kar karan térenap yaewourrá énéni tére námpon.<sup>e</sup>

### Diotrefes ntia Demitrius

<sup>9</sup>Ono kar ankwap wae yiráp siosomp kumwi nampan maok, Diotrefeso yiráp am sios námoku taokeyak naeri námp kwamp, námokuráp ninikaokria yinomp kar wa mo námpono.<sup>f</sup> <sup>10</sup>Aenámpantá nánkár ono yumonapok korop namp kwamp te, mao kwatae tére námp am érik farákáp nanampon. Mao yinan nkwakwe make kar kwatae sérarrá yarak námpono. Am táman saráp mono. Arop Kwaromp kar farákáp mwaria korop napo, náráp nap mek éréképá akwap mo, tá arop ankwap farákapao námokuráp nap mek éréképá tukup mwaria napo kor, monoriaka tárakwampriaka waráp sios mek youmpantá yéréperá kérép i konámpono.

<sup>11</sup>Onomp nouroup kwapwe e! Amo te takeniamp kwatae ninikaok yáraki kwapono. Amo ankár kwapwe kare ninikaok saráp yarakampo. Arop kwapwe kare ninik fek yarak námp te, mao te Kwaromp aropono. Aeno arop kwatae ninik fek yarak námp te, mao te oukoumwan Kwarén nke moria námpon.

<sup>12</sup>Arop ponankor te Demitriusomp ninikan érik farákáprá sér i konapon. Tá Kwaromp kare kar karao kor maomp kwapwe kare ninik érik sénámpon. Tá ono kor maomp kwapwe kare ninikan érik farákarrá sénamp te, ono waeman kare kar sénamp yumo wae mérapono.

### Ankwap kar kánanke

<sup>13</sup>Ono amwan kápae kare kar sénaeria nampan maok, wampweria pepa fek kumwi mo nampon. <sup>14</sup>Onomp ninik te, ono kareao koupour amonapok koropeaka nomo énénkér tankrá kar sénenempon.

<sup>15</sup>Waráp ninik te sánánkar porokwe fek yak kuno. Waráp nouroup farákapao amwan 'Gude'rá sénapon. Amo kor onomp 'Gude'rá sénamp kar má onomp nouroup arop farákapan sérarampo.

<sup>c</sup> 1:6 Ap 15:3    <sup>d</sup> 1:7 Ap 20:33,35    <sup>e</sup> 1:8 Hi 13:2    <sup>f</sup> 1:9 Mt 20:27